

四庫全書

集部

欽定四庫全書

學餘堂詩集卷五

翰林院侍讀施閏章撰

五言古

入西山

馬首見西山乘興陶嘉月振策峯已紆捫蘿巘逾絕蘭
榭耀玉岑茵閣陵天闕琪樹寒始花紅藥藥初結披拂
散心顏榮落皆逾悅莫鳥歸巖扉陰雲如積雪松林息

萬籟清響中夜發樵隱易為歡市朝性所拙春言采芝
人毋使春芳歇

送吳六益之大梁

碩士甘抱璞獨撫丘中琴一為西北遊京洛皆知音燕
歌動天地荒臺日登臨揮手渡滹沱秋霖久滯淫晨風
振高翼寒蟬響悲吟梁園盛賓客池館成古今宿莽莫
蕭蕭但見層雲陰倘遺雪夜作予卧西山岑

送龔芝麓先生使嶺南

時以左都御史
謫中林丞奉使

但暑驚朔吹陰雲蔽平原執義感綢繆相送不能言鸞
鳳一垂翅孤飛多險艱三江涉波濤五嶺阻巔岼依依
去國戀纏絲悽肺肝羅浮海東曲銅柱天南端方物志
草木濡翰資清歡毋耽汗漫遊驅車愁歲寒

贈楊猶龍侍讀

晨星何皎皎參差不成行人生眷明德纏絲結中腸觴
至各詠言豁達陳悲涼甯歌嗟飯牛屈騷怨沈湘之子
策高足結綬登巖廊歡娛日東出戚戚何內傷坐有江

南客含意同慨忼擊節再撫膺淚下已浪浪抱絃未忍
絕知已安可忘

集張譙明給諫宅同許菊溪趙錦帆張友鴻顧介

石沈繹堂吳六益

鳳凰出丹穴乃棲桐樹枝聯轡滿京洛嘉會良在斯惠
風東南來珍木鬱歲蕤列坐進玄醴薄言敘相思同心
發高唱孰云知音稀古人勗令德努力及良時如何展
嫵婉行行當別離義和無停軌楊子悲路歧今日樂復

樂歲寒心不移

酬莆陽余吏部賡之先生四章

公嘗宰宣城目予國士故敘舊德為多

珊瑚出大海璠璵列清廟珍重及良時日月相照耀歲
晏歸三山黃髮事畊釣青青楓樹林狺狺多虎豹浮雲
去無極側身獨長嘯

二

長嘯何所思乃在天南端荒榛夾路衢峻坂鬱嶙峋有

鳥西北飛尺書來江干發緘再三歎飢腸不能餐商歌
響金石五月天風寒良無清玉案何以報琅玕

三

琅玕結為珮懷袖光歲蕤褰裳北樓上永懷謝玄暉芳
風發蘭蕙山水流音微纏綿國士恩知音獨心悲竹實
不可得鳳凰常苦飢三復蘆中吟

公集名
蘆中吟

慷慨淚沾衣

四

衣沾不能言飄風各南北別來逾一紀夢想見顏色故

人振高軌黽勉崇令德叢桂可淹留高車多反側被繡
為犧牲曳尾安可得好愛千金軀毋為岐路惑

送沈繹堂

時由史館出
為大梁副使

回飈振高樹城闕發微涼故人持節去行行之大梁伊
洛方橫流四野何湯湯裴裴三太息豈辭征路長束髮
結華綬梧桐生高岡煌煌丹鳳姿寧從鴻鵠翔逍遙聊
故意脂車褰我裳

二

夙昔頻宴會好音動京國握手衆人中抗言各努力落
日下燕臺行雲去不息一觴未及斟忼慨淚沾臆雙鶴
鳴前林烈風分羽翼振衣躡嵩高延頸睇北極拳拳復
何言但有加餐食

王穀子孝廉下第歸漳州

時閩方
用兵

仲夏集嘉客清醕各盈觴握手發嘯歌登樓望八荒誰
云苦炎節朔風涼衣裳遊子逝懷歸南顧天一方天南
阻且遐鯨鯢亂縱橫城郭多戰壘蕭條悲故鄉念子骨

肉親勿辭征路長大海有明珠皎皎日月光被褐良懷
慨踟躕心內傷

送同年王均五之進賢

時奉 特旨授
大縣者皆召見

山左多大俠忼慨乃性成懿我同門友蚤歲揚英聲壯
心恥曲謹大義急友生再仕仍百里抗手看公卿

天子賜顏色召見趨彤庭巍冠束大帶眉宇千人驚揚帆蠡
澤過倒景匡廬明努力宰南國飲水有餘清人生苟跼
踏萬鍾亦虛名長安策羸馬何似掌專城

六月十八日為先祖母生辰追悼成篇

商飈忽已至炎序猶未畢層城暗朝霧白日何蕭瑟披
衣及明發追往心惛但王母生此辰百感難具述嗟予
實薄祐慈親襁褓失貧家缺媪乳坎壈成幼疾玃玃遭
百罹逝將棄此物祖母出延陵天植性藹吉提攜必在
臂坐抱不離膝含飴未敢哺鞠育翻戰慄簪珥盡湯藥
中夜起唧唧三物禱神明聲吞不得出願移桑榆年續
我蒲柳質吾父曾閔徒定省必周悉乞母勿太苦丁寧

氣鳴咽七歲學畫荻八歲弄紙筆長跪受孝經探懷給
棗栗十歲稱藐孤骨瘦見突兀大母兼怙恃纖細畫曲
折雞鳴出汲回晨炊頭不櫛實恥乞鄰燈宵織照寒月
種豆落為萁種瓜華不實蟲生黃蘗枝食蘗甘如蜜十
八病且婚生計日轉拙寒帷膏火明素壁圖書列坐客
飽盤飧中厨忍飢渴黽勉逾數載生兒夸汗血扶杖哺
曾孫兩世心力竭乙酉亂無象躑躅棄家室烽燧明川
原戰骨壘丘垤負母赴深山喘息氣倉卒是時風雨來

泥滑屢顛蹶前有蝮蛇岡後有猛虎穴母孫但相抱日
落山岑律嬌兒忽已殤衰白肝腸裂隴坂寒楓林清霜
雜雨雪古藤花自隕蒼耳子偏結亂後返敵廬燐火耀
蓬葦門前新戰場葵藿久蕪沒山谷紛伏莽城郭響感
栗錦帙代薪炊青箱貯芻秣儒冠供廝養不爾則鞭韃
苟活昧生理射策上京闕奔迫登王程蓬轉不得歇結
綬走幽燕驅車歷楚粵閭閻高九天陳情空拂鬱白髮
已黃泉遊子尚役役

祖母屬續時
章奉使粵西

逾年就苦塊罪重痛

難割猶憶歲在寅休沐值今日母哀久喪明孫病亦艱
晚強起奉母觴舉酒含淚啜哽咽相慰勞豈謂即永訣
負土非佳城荒墳寄嶺嶠卜吉信茫茫隱忍守故轍碣
石望江東墟壠邈天末欲薦一卮酒遊魂悲遠別音容
日在眼夢寐久恍惚骨肉性纏綿歲久漸寥闊孝養誓
平生既往難補缺冉冉予亦衰星星垂短髮浮雲萬里
徂中路何當輟側頸望蒼蒼舉聲腸斷絕

滄州值同年何省齋南歸時予赴官山左聯舟信

宿詩以錄別

予將東征時是子南歸日握手何泣然惆悵事非一君
昔官石渠英年奮健筆

至尊為開顏嗟咨問家室侍從豈不榮退朝惟抱膝予
性苦齟齬與君則膠漆知子戀丘園未謂即相失鸞鵲
羽差池裴裴眷儔匹送子不能寐伏枕長唧唧

二

君家舊丞相閎閎冠南都三十為侍中出入承明廬兄

弟大小山不數專城居二親尚強飯三子皆璠璣康莊
展驥足萬里無崎嶇胡為耽寂寞中懷鬱不舒滑稽鄙
曼倩晚退嘲二疏古人未足尚今人復何如

三

昨日辭城闕今日來津門同心二三子出錢開芳尊延
州義更切老去交情敦灑落一千言長歌聲欲吞

吳梅村學

士有送行百韻

嗟予氣鬱結執手惟銷魂東西既歧路川路方

駿奔龍劍忽已合水宿同朝昏予懷爾偃息爾勗我騰

竊陶陶過夜半纏綿難具論何以定久要叢桂有芳根
詠竹熏籠

慚非博山爐猶隱湘妃淚提攜藉纖手得入合歡被爇
炭鏤鴛鴦薰芳薦蘭蕙常恐炎節至棄捐獨憔悴

闕里詩

朝登泰岱巔手探金泥策莫宿曲阜阿側身洙泗席中
庭維杏壇檜栢參天碧禮器陳鼎彝圖書燦琮璧雖非
顏閔徒勉旃思踐迹斯文今未衰靈爽倘不隔肅雍視

几筵四壁響金石再誦高山詩詠言矢無數

濯纓橋

官舍有橫渠與湖水通舊置木檻經歲輒朽予為易
石梁命曰濯纓

官閣倚湖渚橫渠漾漣漪還如故園水清淺通荆扉伐
石代浮檻濯纓欣在茲春草紛沃若秋荷餘芳菲空水
相照曜秀色忘朝飢誰知濟川客回首垂竿時柱下迹
已混魯連心獨悲感彼滄浪趣永與漁父期

射書臺

在聊城

城東有荒阜霜雪白皚皚寒鴟鳴落日狡兔穴蒿萊為
問此何地云是射書臺仲連滄海士俶儻天下才浮雲
視圭組潔志謝塵埃飛鏃逞雄辯堅城為之摧壯夫絕
吮死萬姓一何哀流血溢城闌積骨高崔嵬賢愚同白
刃千古傷人懷

登歷城縣學高樓

海內昔全盛歷下多鉅公華泉高唱發滄溟著作雄殷

許相羽翼倡和成宗工蕭條近百載零落如飛蓬圖史
付兵革茂草淪鼓鐘攘攘遊俠兒白眼羞章逢有美二
三子拮据守雕蟲短褐揖長吏青羶無宿春儒冠不復
辨斯文竟鴻濛補苴備俎豆締構及學宮憑高騁予目
疊巘何龍嵒霜嚴凋古栢飈急響枯桐惟餘華不注萬
古青芙蓉尼山亦孔邇孰使吾道東勞歌聊見志寄言
雲中鴻

宿蓬萊海潮庵

精舍俯丹崖複閣眺窮髮春茲物外遊寧辭雲際歇日
暝紅霞散洞陰瑤草發緩帶馭天風臨流坐海月洪濤
爭怒號島嶼時出沒成連移吾情安期逝超忽天雞鳴
中宵白露如凝雪

陳尚書祠

陳靖獻公迪宣城人狗建文難族且盡一乳媪芮氏
竊公襁褓兒逸諸竇中既八歲媪且死泣曰子陳氏
兒也我不言誰知者事遂聞時文皇怒稍解詔成登

州四世而侍御公鼎以直顯尚書公其學繼之為登
右族予校士蓬萊因謁公祠為文以祭之兼賦是詩
嗚呼維靖獻九死斷人腸宗枋餘白骨墟墓發幽房猗
與公始生實維我陵陽天命垂一髮瓜瓞滄海旁柱史
既鵲起尚書彌鷹揚孤鳳將九雛厥聲何煌煌始知萇
弘血萬古騰光芒明禋並嶽瀆正氣升扶桑靈旗邈仿
佛披髮遊大荒嗟予復何為零淚沾衣裳

趵突泉

勞生慚物役越郭就臨眺
澹澹涌寒泉淵淵發地竅
天吳翠旗翻白龍長尾掉
荇藻冬青葱雪月宵照耀
洑流王屋來澄觀一清嘯
逝者悵如斯素心愜從好
停策漱潺湲盪胸歸要妙

金線泉

今為鍾氏園林

齊州罕亭榭涉園遂忘疲
古木高十尋列蔭何參差
危梁覆深藻白石粲芳池
閒寂謝繁響條貫吐漣漪
臨流將夕景水喬孤雲歸
餘津被苔蘚寒卉揚葳蕤
長嘯懷

古人洋洋可樂饑

芙蓉泉

好鳥鳴蘭薄春風柔且嘉
振轡肆逍遙潛波湛清華
詎矜巖洞遊寧要羽客家
虛白茅宇靜峻嶒石檻斜
連珠出水面散作芙蓉花
盪波生微風照日成流霞
衆人忌獨醒吾生苦無涯
蓬萊近清淺安得乘仙槎

古意送馮殿公使粵西

驚飈正凜烈臨歧班馬鳴
雨雪滿山谷隴坂無人行
行

行去不息周道多荆棘南登衡岳巔回首望北極山川
日已遠耳目日已換青林啼鷓鴣遊子腸堪斷入亦復
踟躕出亦復踟躕安得諧雙龍與子萬里俱

送梁慎可少參入賀

明湖開積雪和風扇寒條嘉客延清歡新陽啓遊遨願
言展嫵婉芳醴陳中宵握手景未昃離心來鬱陶祇役
叩閭闔官人戒星軺長安車馬馳玉佩相招邀猗與高
陽族元凱實聯鑣為樂誠未央焉知我心勞君子惜令

名小人徒嗷嗷何以解飢渴平生有久要

讀邢孟貞遺詩

邢家石白湖
時稱邢石白

石湖有詩癖厭作時人語褊性寡推服名高亦齟齬
吾儕二三子同病各相許歿後收遺文生死情倍苦深宵
風雨時讀罷亂心緒畢世絕歡娛高寒出肺腑悲歌良
獨難微尚亮誰取墓木忽將拱田園成宿莽寓書存藐
孤祿薄媿無補三復聲嗚咽平生淚如雨

張氏葯園

鄒平

別墅傍城郭髣髴陵山椒石路淨積蘚池檻映崇條商
飈凜初發春華藹未凋連蜷糾絲蔓綽約舒紅蕉檐前
長白山白雲長條條高館納朝爽素琴響秋宵中林自
開逕當門自生蒿遙揖赤松子物外可招要

懷顧見山工部

時司權
夏鎮

仲冬風雪交層冰堅巨壑浮雲邈無歸逍遙放寥廓憶
我同袍子聲名滿京洛竝轡偕翱翔酣歌事如昨神龍
歸大澤河上獨棲託澹蕩濯纓心蒼涼懷古作側聞寒

雁吟唳我東廂鶴物情眷同聲悲鳴苦離索借問蟬冤
客何似滄洲樂

送丘海石之任高要

丘子北海彥今為南海行道路緬修阻羽檄紛縱橫再
拜向我言引疾且歸耕丈夫貴許國努力垂令名子實
飽經術慎毋負平生端州憶舊遊郭外江水清啄研鑿
江石抱琴鳴江城安危在良牧逝將偃甲兵相思日云
遠惆悵天隅情

元夕行

平生束髮初遊戲長河干漁燈爛蓬華春韭成盤餐鼓
擊促飛觴踏歌忘夜闌燭龍動鱗甲火樹紛琅玕少年
蹴鞠舞兒女傾城看喧闐相蹂踐墮釵遺履還閭巷事
瑣細為歡亦多端此樂如昨日盛氣俄摧殘兵荒廛市
改遊子行路難三年客燕市兩年棲厯山其危如草木
豈曰耽微官爛漫銀花好臨觴勿長歎所思邈天末歲
月急奔湍賓御各懷歸四座寂不歡乃知絲竹音不解

憂人顏

濟南望叔父不至書懷

一歲再寄書家人遲不至攝衣臨高臺引領無遷次計
我濫齊竽守官恐失墜遣使還故里但有平安字前年
叔父來骨肉偶然遂荒途半蒿萊虎穴兼賊騎子月天
正寒風雪斷征轡敝裘剝剝餘入門冰在袂仲氏方弱
齡跋涉性所畏追從過濟水黽勉好兄弟一二故人居
顏色同憔悴炙火手上僵委頓霑微醉時予將出門王

事無留滯語婦謹晨昏滄髓親中饋新聞玉露釀細作
銀絲繪老眼顧盤餐含淚轉歔歔謂爾父墟墓推牛今
尚未同氣念凋殘哀白忽如贅嗟予章不敏褊心闇吏
事切切述祖德多憂或怒詈衙齋閒有餘中宵長不寐
臨別仍敝簾跪送以雙淚叔父喜我貧故人多責備貧
交安可忘世路棘如蝟汲多井泉竭途遠車輪敝自非
食蓼蟲焉知辛苦味揮手再三別中心有餘媿遊子懷
故鄉隔歲復期會臘月水腹堅輕舫絕淮泗凍解過兵

船其勢如鷹鷂弓箭各在腰行人共驚悸昨聞江南雪
酷寒殺松桂敝廬半斂側補葺賴薜荔馬瘡僕且痛驅
車良不易將毋慎遠遊恐為貧官累海隅有小鳥其名
曰精衛欲銜西山石堙海為平地所志則已遠那復作
生計四顧儔侶稀哀鳴振雙翅側見黃河流鯉魚長尺
二附書亦徒然歲月傷迢遞思欲隨晨風翱翔九天際
尋厯下亭舊址

荒亭更百戰往迹皆逝波古人不可見來者自為歌塵

纓聊盥濯杖策重經過一城半湖渚清風生芰荷藉草
酌我酒數杯顏已酡人生日苦短流水一何多

寄顧與治

客從石城來是君平生友再拜未及言借問見君不答
言君愁疾皓皓成白首有客歎荆扉盤中止春韭筆札
資餽糧田園皆在手日夕浮雲陰北風響寒牖買姬亦
不御甘作窮獨叟人生各有涯所貴惟不朽著書好自
編平生復何有請為解鬱紆金陵多美酒

寄孫八羽辰

弱齡多壯懷被褐成歲晏門巷長蓬蒿溪堂滿鉛槧手
自錄全史孤吟恥雕絢陟山餐高霞汲泉飲寒礪羈宦
懷故交春草滋芳甸思欲附晨風道遠隔鄉縣我寄一
端綺其質如白練明月出東嶺素衷倘可見

酬李叔則

李罷官流寓廣陵

佳人眇何許遠在大江湄孤鳳雖斂翼顧影生光儀遺
我尺一書勗我師仲尼感子故人意俛仰寸心違吾道

日陵替官守狗文辭黽勉望鄒魯側足不敢移思為梁
父吟惆悵知音稀

家書再至

客夢迷故鄉故鄉書札至問汝出門時是月十有四前
書一何滯此書一何疾得函不敢開垂頭先惴慄書中
復何有但為賤子憂坦步恐覆轍問我平安不駕言將
出郭荆棘生道周置書再三歎所憂非所謀

送孫忤庭都諫還都下

昔卧白雲署見君青瑣闌耿介一言合意氣縱橫飛日
月何推遷歡讌不敢追室邇成契濶京圻還別離久雨
潦周道殘暑颺炎暉握手難盡言惆悵中心違海內得
知己一人不為稀天路高且長會合當何期

贈徐搖上進士謁選

徐子久釋褐高卧耽舊書門庭常閒寂州縣恥趙趙持
此忼慨節不為章句儒利劍方出匣四顧無躊躇把酒
送子去策足陵天衢浮雲可俯視白壁不可渝

送吳自明歸里


羈宦戀親交相倚忘飢渴依依遂彌歲
千念集莫節江南烽火後川路多流血
艱難消息稀中腸屢斷絕子為我遲歸
倚閭有白髮綈袍不禦寒努力慎風雪

望仙臺

新泰縣

崔嵬新甫山蜿蜒百餘里連峯障日寒
翠柏參天起窅窅巖洞深津津流石髓
遙見羽衣人青霞隨玉趾借問此為誰
云是洪厓子漢武非仙才登望亦徒爾
覲面不

相識延頸睇海水千載鬱蕭條荒臺蔓葛藟



學餘堂詩集卷五

欽定四庫全書

集部

學餘堂詩集卷六

十至

詳校官檢討_臣劉錫五

助教_臣常循覆勘

總校官庶吉士_臣何思鈞

校對官中書_臣方維甸

謄錄監生_臣吳振興

欽定四庫全書

學餘堂詩集卷六

翰林院侍讀施閏章撰

五言古

書感

上哲能不憂中人尚知足偃鼠飲長河快意在滿腹神
龍失所依進退成抵觸天道亦何常平地多翻覆積毀
詎有階守正豈蒙福吉凶吾曷從握粟未敢卜

清源行

視學秩滿將歸道經臨清諸生携具相餉却再四不
可嗟乎施子服官不得盡其道循職而已諸生復何
德予哉作清源行

駕言及星爛輟軌已夕陽逝將返初服戒僕裹餼糧濟
濟二三子依依登我堂長跪出篇什携贈兼酒漿苦辭
不忍去佇立久傍徨改顏為斟酌僕馬各充腸平生薄
口腹此意獨難忘春風拂前浦芳草生清光含情無可

極遺響託滄浪

北海有一士為孫子仲孺作

實侗址亭
相國子

北海有一士高步覽八區簪纓推世胄章句薄腐儒嗜
古賞自延探奇目無虛藩溷畫筆札坐卧皆詩書非徒
富述作實恥經術疎趨庭過薊北結友連東吳平生非
任俠意氣雄千夫男兒貴不朽浮名何足圖盛年振高
轡策驥騁修塗

留別徐符嶠臬使

燕臺射策時與子同陋巷晨昏屢叩門索酒竭鄰釀聯
袂捷南宮時艱資僦僕王師方入粵特簡俾司餉三年
冒矢石側身飽炎瘴闢地始到官瘡痍非一狀奉使予
南征入覲子北向上下各孤舟風帆不相傍到今泉東
藩把臂喜無恙同志絕然疑感舊敘少壯法嚴多大獄
誰肯問死妄寬和干國憲刻急業物謗慘澹慎平反讞
成懷餘愴有時厭丹筆舉杯眺青嶂聞我歸故園惜別
獨惆悵野性習沙鷗五湖將浩蕩感茲意拳拳含情辭

祖帳

發濟南示諸生

曰歸不暇寐中夜趣晨裝清泉帶城郭依依垂綠楊羣
公列祖帳臨發難盡觴繾綣復多士追送踰川梁下馬
與之揖羅拜淚沾裳齊魯古大國東海風泱泱起哀吾
未逮知己胡不忘逝矣千里心悠悠九迴腸雖下董生
帷誰升孔氏堂黽勉有遺恨努力永相望

寧陽行

客行倦修塗流民填路隅吞聲但長跪淚下沾衣襦停
車傾我篋人給慚錙銖去此未及遠接踵相號呼誰能
盡沾灑緩死爭須臾去年民為魚今年麥又枯豈無蠲
租令不得收溝渠蕭條日將夕酸鼻空踟躕

過洪林值湯衣白邀宿

東峯餘返景疲馬嘶秋原黃花寒婉孌流水莫潺湲所
親值野老邀我歸南村喬木秀墟里零露繁草根笑歌
不覺遠明月方在門苦陳去年亂窮巷無雞豚園蔬雜

筐果顛倒引匏尊夜深卧草閣閉戶溪聲喧白雲入檐
隙浩然清心魂

秋夕邀吉水宗人偉長宛溪汎月兼送其遊潯陽

同大美阮
懷揭長

輕雲歸遠岫涼月見江樹棹歌可遊娛心賞未遲暮亭
亭謝公樓皎皎出城頭潛鱗粲可數微露溥芳洲水流
宵不歇客子行常發盆浦潮有無廬峯興超越歸塗近
鄉國羈緒悵離別言攀九疊屏儻憶雙溪月

避風入二條港

解維燕子磯白浪阻征路橫江紆桂楫曲港截瓜步一
水蓼花洲夾岸垂楊樹田家開野店籬菊含秋露遠見
棲霞山青青若回顧不有石尤風那盡江村趣

妙高臺夜坐懷元可

卽子瞻佛
印賦詩處

日落水烟起茫茫連岸白褰裳陟高臺涼月皎秋夕古
人不我待露氣霑瑤席忽憶龍眠叟遠引就禪寂桂嶺
舊擔簦匡廬復飛錫遊咏與之俱屢折登山屐勸我學

無生危言同振溺心跡未能併出處尚狼藉解帶思同
遊天末久離析人生無老少皆為天地客東望海門深
南睇江雲碧巖壑留清暉浩歌傷往昔

題王阮亭漁洋山人集

有客卧招提聞鐘百慮止時見楚江月遙從烟際起橘
柚垂虛簷清光生石几手把瑤華音靜念同懷子綺麗
復清冷濡翰信云美心目散山川衣裳被蘭芷羈人易
感觸三歎不能已寂寞將移情茫茫聞海水

登文選樓

廣陵精忠寺後
有昭明太子像

遊目憩精廬涉閭復清迴綺疏鳥雀喧層軒松檜冷白
雲緬逶迤隔江矚峯影生平薄黃屋篇章性所秉欣賞
集羣彥朝譙達夕永創獲矜校讐散籍歸匠郢梁社久
丘墟隋宮餘舊井廢興更代謝丹樓復華整斯人既已
邈望古還引領橫流賤毫素蘭茝雜萍梗眇眇千春懷
淚下如修綆

吳母苦節詩

歎人胡氏早寡撫遺腹子延支終其身

君遺妾有身妾思君同穴夙昔嫁君衣拭淚盡成血別
鵲一何早哺雛一何好萊彩曜中庭妾身自綦縞喔喔
霜雞啼札札鳴機絲機絲有斷續素心無改移

歲暮送陳伯璣之武林

先是期偕
往不果

停楫待同舟送君成獨發惆悵紛難陳佇立生白髮養
可歲序渾客愁無新色七風欠瓜蓬安知吳興越工貞

平山堂

寒色靜四野平岡走孤獸振策肆重遊蕭條改結構荒
榭俯宿莽頽垣繚虛囿抗軌思昔賢遊讌貴巖岫悠悠
六百年遺徽邈難邁殘荷尚餘葢丹楓錯成繡喪亂悲
山川戎馬此馳驟舉目睇京峴屢颺暗清晝懿此崖際
泉清冷聊可漱

董仲舒祠

攘攘五都市南北交驅馳貴賤各有營崩迫無停時我

過董子祠中心悵有違相傳此舊宅精靈儼在茲斷碣
蝕蒼蘚荒几走伊威蘋蘩誰復薦清風吹我衣漢初尚
文籍大道久迷離夫子挈陞緒卓矣王者師如何末世
士罄折爭刀錐威鳳翔九仞腐鼠安足希

曉望燕子磯

挂席沂奔流回眺滄洲靜渚烟暖未分巖雪殘逾瑩峻
嶒松色寒窈窕嵐光靚延目辨蒼茫木末露樵徑亭剝
何參差丹青遞掩映不見六朝僧遠聞一聲磬

舟中望采石

孤嶼起中流，巖業連江岸。
霜嚴碧松白，樓迴朱霞爛。
巨石陵天門，崖宇久漫漶。
咏史想遺音，然犀懷壯觀。
潮汐自往來，人物幾凋換。
颼急吹豚魚，天陰鳴水鶴。
英雄此戰爭，回首一悲嘆。

早春三天洞至仙人巖

寒巖飲衆妙，惠風蕩疎木。
洞穴無人居，玲瓏闢華屋。
春陰香乳流，谷溫瑤草綠。
出戶見前峯，重雲無斷續。
乘興

復杖藜行歌散煩促古樹含丹葩餘雪長靈瀑僧扉鑿
陽崖茶臼入深竹采真客安往悵望空山曲

宛溪春水曲

夜宿水聲中朝汎山烟裏洲沉沙尾截雲疊魚鱗起春
風不可贈美人望江汜愁心與白蘋搖蕩幾千里

微雨至慈靜寺

同陶夢劉

積雨知不晴薄陰亦可喜舟浮葭莢沒樵撥鴛鴦起捲
幔受輕風戛舡散甘醴青峯雲霧交明滅同海市不惜

濕芒鞋遠踏空濛裏南屏枕寺閣甘泉湛階圮古塔挂
新羅丹青爛成綺宵冥嘯嶺猿舉歷迷山鬼回艇睇前
峯惟見碧湖水

湖上荅陸麗京

翡翠集蘭苕鳳凰棲崇岡光輝各燦爛羽翼難頡頏西
陵富才彥哲匠挺珪璋閎閎豈不貴蓬室潛幽光矯志
厲金石濡翰辭篇章譬彼陽春月百卉敷芬芳窮岫逢
赤松跪受不死方蘭櫂激清流為樂殊未央永言申宿

好德音不可忘

贈柴虎臣

與君始投分把臂遊長安列坐盈觴酒吐論中情殫清
秋朔風厲良會忘夜闌篇翰曜連壁客子為加餐山川
一離折春華成歲寒孤鶴潔羽翼飲啄良獨難竭來卧
城隅咫尺限重關浮雲隨迅飈萬里何時閒相望懷慊
慊撫枕一長嘆

贈毛馳黃

所著有韻
學辨諸書

總轡息江汜采蘭臨芳洲佳人會良訊願言同行遊矢
口發丹葩德音申繆綢餘波沿六季高唱溯商周律呂
既精析風騷資討求綺麗傷人心忼慷淚雙流申椒雜
衆草道遠無蹇修不如呼所歡飲酒登高樓

留別越中諸子

時徐伯調祁止祥毛大可張南士
姜桐音沈康成羅弘載相繼至

我昔遊會稽息駕瑯琊山賓從共翱翔長嘯浮雲間興
文歡受簡臨水駢芳筵朱李泛南皮清夜會西園良宴
宛昨日馳暉凋壯顏涉江枉相存羣彥何翩翩尊酒歡

未畢良時苦不閒聊和絃歌曲結臆不能宣子為潛波
鱗我作衝飈翰勗哉璠璣美揚芬垂簡編

答虞景明

嘉會城西隅皎皎陽春日手持郢人唱膠結意難畢宛
轉含悲辛清響逾琴瑟申章復永嘆知音慕儔匹豈無
桃李華眷此蘭蕙質奮志揚芬芳結佩采秋實誰言傾
城姿終老在蓬室

上天竺雙檜峯

昔聞九里松夾道響清瀨今尋雙檜峯壁立衆山外危
磴壘丹梯陰霞成紫蓋平臨江海寬俯看丘壑碎人生
若飛籜倏與流飈會濡首塵埃間寧識滄洲大乘風叩
閭闔浮雲接衣帶

答魏山人

養疴倦辭賦倚醉耽孤眠悠然遠山雲墮我北窗前攬
之不可得滿屋生蒼烟知子薄雕蟲清嘯懷列仙時傾
若下酒不問東臯田誰當理輕策相從巖壑間

暮投六一泉寺

石泉近湖曲皚皚自清泠
照見古人心高風邁箕頽振
策陟山椒朱霞散西嶺
日暮烟乍生鳥歸林逾靜
逍遙憩石梁杳冥動漁艇
夜久衆星光猶明數峯影

荅瞻伯

芙蓉生綠波乃臨大道側
芳華雖憔悴濯濯好顏色
夙昔贈我言綢繆在京國
荏苒逾六春流光一太息
新聲日以張正聲日以熄
所愁郢客吟時俗罕相識

贈陳天祓

陳子瑚璉器珍重薦清廟官曹開素襟澹蕩有同調比
舍易為歡時看一尊笑未擬厭承明抗言思海嶠出守
豈蹉跎掉頭乃長嘯草閣傍湖山清光相照耀猶懷富
春近儻就嚴陵釣

荅史及超修撰

史乙未狀元乞歸
終養又不食肉

白日出海門天宇何寥廓誰知應龍姿潛鱗戀丘壑射
策敷天人著論攄蹇諤

天子推國士高坐石渠閣苦陳烏鳥情歸就菜衣樂肉食餘鼎俎餐霞止藜藿深巷隔九遠下帷耽寂寞坦履靜無營素衷欣有託感君枉贈篇德音非虛作

宋荔裳署齋留別

拳拳無終極中夜復淹留明燈移綺席卧我百尺樓念此吳會歡緬懷燕趙遊人生逾四十飛光向西流十載一良會歲月忽欲邁雞鳴獨轉側起坐增離憂蟻穴成江河寸壤累山丘志業貴早立升斗寧足謀明旦各分

手策軌期千秋

從遊諸子追送至北闕

命楫日將夕言發一何難親交並集送臨期猶未還行
行越湖墅衆星繁以繁殷勤二三子出餞此河干臨流
啟高館四座聞秋蘭疲策昧飢渴對俎不能餐聊為盡
斗酒以解離別顏行矣各努力先民有遺言

雜言

好色衆所見自昔稱傾城蛾眉豈不姣見者不分明婕

好辭玉輦團扇還吞聲鑒貌良獨難誰能鑒精誠

二

愛馬能買骨萬馬樂為死獻玉不惜身大璞甘為毀知音既已稀寧作中林士哀絃發苦調沈憂不可弭

宴高子奮水部官亭

丹檻陵滄波飛梁互別浦詞人此高會詠言相勞苦華館生長風北山過疎雨萬頃碧荷花酒氣作香乳連牀多賜書疊石成江嶼歡延石城下別憶天津潞落日悵

離顏秋色滿平楚

孤松篇贈杜于皇

孤松無沃壤托根生寒山介士無餘謀斂手拙朝餐前
庭但種竹後園但種蘭飢來出奇語大笑開歡顏言當
棄舊宅負耒林丘間沮溺非爾事抱書聊閉關

飲秦淮水樓

青溪蔭垂柳夾岸浮朱樓延目睇鍾阜餘霞炯未收親
交良會合置酒聊綢繆水氣接靈飈夕爽成清秋王謝

邈千載一逝不可求
高言絲竹靜暮鳥何啾啾
明旦我當發道路良阻修
誰令江漢廣浩然增離憂

湖西行

辛丑歲分守湖西壤瘠歲饑
有司坐逋賦失職相望
予奉檄按部督促是時西南
用兵不逾時符牒三四
至吏民後期者法無赦於乎
一官貶斥不敢辭當奈
民何有痛相告誡而已作湖西行

節使坐徵斂此事舊所無
軍糈日夜急安敢久踟躕
昨

日令方下今日期已逾攬轡馳四野蕭條少民居荆榛
蔽窮巷原田一何蕪野老長跪言今年水旱俱破壁復
何有永訣惟妻孥歲荒復難鬻泣涕沾敝襦腸斷聽此
語掩袂徒驚吁所慚務敲朴以榮不肖軀國恩信寬厚
前此已蠲逋士卒待晨炊孰能緩須臾行吟重嗚咽淚
盡空山隅

大阮歎

新淦縣東山有大阮其俗不急賦稅不用兵則吏廢

法予檄招之幸有至者庭諭以利害繼之流涕衆皆
感泣於是陰捕其豪十餘人後至者蟻集雖然比歲
宿逋累鉅萬猝何能補故作詩憂之

叢山如劒戟灌木蔽巖岑其水獨南流谿谷皆阻深山
民鳥獸居不馴匪自今追呼敢逆命兵革踵相尋未能
靜伏莽火烈悲焚林殺人稅無出遲回傷我心蚩蚩亦
赤子念爾為沾襟招手語父老鴟梟懷好音宿逋既累
歲敲骨力難任民頑實吏拙許身媿南金何時免素餐

引疾投吾簪

竹源阮

悲民難也地在新淦之東山其鄰曰大阮多盜兵至則走官檄竹源諸阮義衆捕之而逸其豪已而盜殺竹源殆盡君子傷之

殺虎防啞人芟蔓莫留根留根終遺患傷心不可論竹源數百家今餘幾人存竹外有源泉血流泉水渾羣盜故比鄰姻婭如弟兄反戈相啖食收骨無兒孫斃斃數

寡婦零落依空村
凶年嗟半菽
撮土招遊魂
人亡畝稅在
淚罷還聲吞

不寐

就寢已難鳴昧旦
復先覺荒城風雨急
怒號如虎豹
勞人一寸心
萬事苦奔峭
法嚴吏牘多
敢言吾職要
習瘁不知疲
未暇一長嘯
徵求盡草木
飛輓連海嶠
湍水無靜鱗
促絃無緩調
力短達民艱
空蒙肉食誚
誰憐當塗人
隱憂莫可告

集就亭

臨江官舍有高阜余就而亭之下
臨蕭江前對閭阜山名曰就亭

安拙成寡營賞心惟坐嘯結構期自然孤亭恣遊眺惠
風始飏蕩旭日先照耀埤垵帶清源青冥開遠嶠野老
或荷鋤舟人時鼓棹雖違丘壑情即事見耕釣遐矚有
餘懷臨觴難具道

自吉州之泰和道中

行潦猶在塗征車不遑息峽折忽泉聲徑轉復山色崎
嶇巖壑間出沒何終極荒塗行旅稀虎跡交南北四顧

多廢墟遺礎委荊棘回思未亂時山民亦繁殖

宿黃旆鋪

積雨暗千山陰雲催日暮哀此僕夫痛踟躕宿中路土
室倚頽垣荒村存老嫗勅吏慎勿擾芻粟可自具吏言
糞無薪乞糴亦無處時危供億艱含悽未忍怒盜賊兼
虎狼空山懷百慮從騎夜擊柝宵分屢驚寤明旦風雨
中雞鳴驅馬去

寄李叔則秦中

舉世仍兵革章逢多老瘦烈士卷壯心悲歌倚巖岫瀉
為江海流激與雷霆鬪未嘗需苦吟何事費雕鏤信手
作飛白騫騰軼篆籀棄官囊無錢詩草滿雙袖旅食家
廣陵文酒日輻輳贈答勤篇章洪鐘無虛扣一朝測禍
亂早計決去就君自揚州西歸
次年揚遂苦兵驅車返幽谷種菊開山
圍關河自茲隔道遠阻朋舊側聞太華奇思攬蓮峯秀
物役羈我身何時裹糧糗馳情望西笑離思纏宵晝

齒落

延歡苦不留憂老忽已至未知筋力衰齒牙先失墜木
落春更生日落朝出地感茲同逝川一往成捐棄妻子
各驚吁為我色憔悴百族相啖食利齒反為累踈缺亦
何傷嘯歌猶稱意三復蒙莊言養生有餘媿

遣憂

岷山濫觴泉三江成電激岱宗膚寸雲九州霖雨澤丈
夫志四海經營負長策胡為甘獨飽拱手看飢溺四野
多蕪田遺黎寄鋒鏑遠念平生親歲饑多蹙額節我口

腹餘分之以甌石少者寄升斗事微取當厄猶媿火燎
原沾灑止涓滴自顧亦何有薄祿存四壁

送表弟馬文虎

山中松與柏有時相抱生與子共本根能忘骨肉情中
情苦難言一官憂患并常恐素絲染抱疴思歸耕臨觴
未及醉揮手送子行持此心耿耿歸照雙溪清去帆忽
緬邈流涕沾冠纓

買書

吏牘紛填委日與編簡踈黽勉耗薄祿時時搜舊書積
笥不能貯列架盈坐隅妻孥顧我笑餅粟罕留儲况君
目已眚殉此無乃愚卿言亦復佳性癖苦難祛卒業誠
未易泛覽資遊娛行當營草堂歸就雙溪居枕籍同寢
處窮年長宴如

次龍頭山有懷胡悅之處士

劒水有遺民言在龍山岑維舟日已暝江亭生積陰夜
久露微月參差見前林洞門花塢暗曲磴茅堂深風波

浩無極川路邈難尋勞生寡歡笑索居長悲吟佳人阻
咫尺孰與操素琴

洪川送王白虹

子來我方出踈我棲江干積旬始握手春花忽已闌長
風蕩積水高樓生薄寒拳拳良宴會各言行路難枉贈
吐嘉藻殷勤抒肺肝慚無明月珮奉為君子歡撫膺懷
舊遊鬱結思千端和歌不能竟臨歧一長歎

臨江憫旱

瘠土嗟薄穫歲豐長忍飢戎馬況疊跡田園成路蹊荷
鋤代牛力播種良苦疲朱火肆燎原禾稗同一萎民亂
如恐後况乃驅策為徒跣呼百神嗚咽致我辭政拙未
敢苛召災今則誰雲漢何皎潔箕斗正參差心知閭闔
遠側向高天啼明日急芻餉吞聲重涕洟

學餘堂詩集卷六

欽定四庫全書

學餘堂詩集卷七

翰林院侍讀施閏章撰

五言古

憫鳩

前庭有叢竹枝葉自相交
袒跣坐其下六月如寒濤
飛來兩鳴鳩向我營危巢
託身洵云好轉側苦回飈
卵成再顛覆長夜音曉曉
瞻彼松與柏豈無千尺條
忍拙守

故宅不敢辭廳搖昨日更瀕洞烈風摧竹梢一雛半在
卵毀棄委堂坳其一正黃口墮地無羽毛攀巢納其子
方法驅兒曹父子喜更生後笑先號咷行當雙翮健飲
啄隨所遭勿復學鷹隼搏擊飽腥臊生成艱萬類嗟我
中心勞

叔父寄敬亭茶封題曰手製

敬亭山產茶甚多僧不勝徵求卒雜以他產吾鄉好
事者嘗於穀雨後數日入山手摘而焙之香色並異

馥馥如花乳湛湛如雲液將茶煮江水不改江水白問
此來何方言出君故鄉故鄉山嵯峨我託根生山阿枝枝
經手摘貴真不貴多念我骨肉親欲歸會無因遊子感
故物惆悵江南春

新穀篇

是歲湖西大旱

牛食礪底草雀啄甕下粟赤地無良苗長吏進新穀饗
人得穀歡主人見穀歎晨炊薦祖考淚落盤中餐臨觴
不忍傾飽食非所安哀彼耒耨人長飢摧肺肝

寄王宗伯敬哉先生

中庭未零露向夕秋響發煩憂攪孤懷驚魂屢飛越誰
使平生歡悠悠七年別離思未敢言拂鬱中腸結天路
信緬邈馳情無阻歇仰首歎流光盈虧感明月

過豐城感懷

孤城暮蕭瑟北風一何寒飛沙捲殘箨飢鳶叫哀湍寶
劍沉幽壤光鋌天際看一朝剖石匣拂拭驚人間離為
兩雄飛合為雙龍蟠神物今安往顯晦邈無端鉛刀笑

霜刃壯士多苦顏起行看太白淚下空潺湲

夢至獾山草堂因寄梅季升

數從獾山遊不作獾山詩中宵有清夢飛落獾山陞帆
收峽石浦雲白敬亭祠主人立柴門攬袂歡相持咄嗟
膾魴鯉歌謔無不為信知君好我魂往相追隨涼秋歲
將晏木葉翻庭墀感茲搖落候增我故山思獾山不易
得山麓仍水涯扁舟思就汝對酒開心期醉則擁書卧
旁人知我誰

感哀

多憂覺體衰寡學苦心弱夜分常不寐形神窘棲託耳目吾故物變態日交作雜治異所宜暄涼互相鑠方寸受羣撓膚澤日侵削中庭木芙蓉未霜花自落浮榮歸故根寒水反枯壑安坐且無營冥心尋寂寞

懷丁飛濤塞外

凜秋隕芳樹落葉隨風翻漠漠入浮雲悠悠踰塞垣孰云忘故根須臾遠葉捐層冰墮手指驚沙推心願舍我

絃歌曲但聽哀茄喧引領睇明月清輝馳九關閭闔可
陳辭念子心煩冤相思道何極吞聲未敢言

送羅安福歸閩

征途一何長別晷一何促游讌未終朝鼓擢發江隩解
組且咏歌抗言反初服因人振歸策孤宦絕僮僕作書
敘情慙惻惻不能讀天南春風早山水日夜綠行就笑
蓉山結廬俯深谷褐被不辭苦誰念玉在璞延目睇高
翔搔首起躑躅

自金鳳洲汎舟至迴龍寺

芳渚綠城南精廬帶江汜雲樹暗千重沿洄才數里上
已忽過眼春光疾如駛嘉會得朋好良辰歡雨止草齊
水逾碧艇進鷗不起野坐憩雙松洲回攬香芷適意且
放歌笑看東流水

鹿江精舍書懷

祇役越郊垌小憩棲招提短垣傍疎竹野色來侵衣晨
登最高閣宿雨初晴時潦浮村徑沒帆挾江雲飛屨市

久喪亂桃李還芳菲蒼鷹自多食白鶴常苦飢束身忍
驅策龜勉筋力微四十已云邁庶幾知前非

花石潭阻風

作吏如浮雲風吹不得住浮雲去無心作吏行多懼跼
促為轅駒踟躕悵前路沂流嬰惡風灘石窘跬步婆娑
憶官閣手植多奇樹雜蕊紅如錦繁枝暗成霧花時久
行役坐送春光暮高歌河上翁獨愜滄洲趣

曉過洪陽洞

分宜縣

宿霧暗未收曉月照蒼翠謝公急遊賞冥搜穿薜荔石
洞炯空明前驅走魑魅物像多髣髴目駭誰睹記清旦
入仙巖得飽朝爽氣丹竈竟何存山花紅委地

化成巖

宜春

雲木鬱江曲心知好丘壑攀蹬尋窅深穿巖得踈豁萬
古青蓮花蒼寒半舒萼鐘歇灘響聞雲開峯翠落荒臺
存往蹟暝烟見城郭延目散襟顏倚石就觴酌却羨無
心雲逍遙去寥廓

送耿逸庵副使歸登封

耿官湖東予官湖西是時以裁併歸

拙疾赧狗祿羨君早旋歸東西兩契濶良會經年稀
章江復相見正值江花飛來飲盱江水還憶嵩山薇
鬱此萬古懷卷舒各有時家園傍少室坐卧延清暉
何年一相訪行與浮雲期

走筆荅陸蓋思高仙

愁疾戒作詩疎慵報書少故人千里書三復心如擣
翩翻真二妙貽贈皆芳草書屋傍湖干蕭森結構好
入門

竹欲暗當堦花未掃坐客張王輩

謂張祖望王
子一諸君

文詞風

格老真率具盤餐數過必傾倒浮雲難久居聚散傷遠
道高翮翔層雲遊魚戲清藻努力春華時令名慎自保

發清江至新淦

官程難息駕日昃命征夫征夫行躑躅積雨泥我塗旱
久始霑足田家歡有餘新禾多秀色四野何敷腴苗成
草亦長農叟無芸鋤登場欣一飽薄獲罕留儲瘠土民
不勤毋乃非良圖誰能式幽風使我百憂紓

長牌驛

傾崖抵浚谷振策緣崇岡人家阻鳥道驛路成羊腸暑
雨既已漲原隰無低昂涉水沒馬腹何以褰我裳田荒
民力殫種穀不成行僕夫亂縱橫蹂踐憂稻梁哀蟬響
枯樹佇足心感傷昔時阡陌地今為麋鹿場

烏象口

峽江城西二港曰烏口象口夏秋江漲亂流苦溺緣
山嶮遠多虎患予命各置官渡未逾歲烏口舟壞於

兵象口舟夫求去憂不能繼故作是詩

江千山色黑豐草與人齊行子時出沒四顧迷東西鳥
象兩崖口斷岸臨深溪欲濟無舟梁人命飼蛟螭緣溪
取山徑修塗何逶迤猛虎所窟穴白骨相撐撐經營置
官渡役以兩舟師徒旅不濡足往來不移時驛使性如
雷喚渡猶嫌遲舟師骨欲折往往遭鞭笞鞭笞且隱忍
毋使行子啼

江上翁

朝逢江上翁鑿船沉水底問君何為爾雙淚落江水一
生事舟楫八口相依倚妻兒死凍餓官家有驅使十月
達黃河驚飈西北起舉棹成堅冰嚴寒隨手指甫歸復
見捉連檣守江涘愚者怒焚舟延燒不可弭本為遁逃
計翻葬魚腹裏此業能陷人沉之禍則已棲鳥惜其巢
毀巢逝安止請翁勿復陳吾亦掩雙耳

觀張桐君遣憂五百字感賦

悲離泣楚臣懷土傷越客越吟五百字聚淚成一石矯

矯雲中翼今為林下翮憐君少年時騁步越阡陌倔強
棄諸生踈散作詞伯陵陽李白祠剡溪謝公宅來往共
翱翔狂歌免蹙額旅泊五羊城藩幕資長策時危賓客
難戰苦海嶠窄翩翩鞍馬間磨墨橫劍戟游子衣線斷
母氏痛永隔慈烏夜夜啼眼枯血淚積豈無陸賈裝歸
來仍四壁妻子寄中途進退兩跼踖舊業依江潭潭水
映門碧殘春匹馬歸總帷纏蘿薜母死逾三年沈痛未
寃窳燬下穴狐狸蠹書委狼藉慟絕乞鄰姬為炊薦魚

麥若翁客晉陽萬里阻音驛誰堪骨肉親生死兩疏逖
漂轉枉扁舟就我同朝夕磨滅如老翁端居甘閒寂新
詩日數首計歲當盈尺官齋飯藜藿素襟吐肝膈飲酒
復不多含愁惜疇昔意氣生蹉跎事往空太息袖短慚
手寒相憐亦何益交遊日榛蕪道路腥齒豁憂人聞累
歎三歎頭盡白

重至黃輓鋪憶高阮懷

去年風雨夜有客同驛舍今日晴雲開駐馬獨銜杯勞

人習執掌歲月忽已往君看白鶴閒雙飛還舊山

遊圓荷池

蕭孟昉別業

名園涉已屢晚坐凌潺湲芙蓉發丹萼翩翩修渚間倚
檻方命酌暮鳥已飛還好月出疎柯照我遊子顏水靜
衆芳歇風收林影閒永夕澹忘歸心賞難為言髣髴見
峯色云是子瑤山惆悵塵中人可望不可攀

清沂泉

幽泉出江側清冽勝甘乳不懷箕顓心脉脉誰憐汝杖

策濯塵纓披榛破太古絺衣日暮寒半濕龍山雨

泰和縣有

龍頭

山

江行遇趙韞退副使北歸誦其嶺南集有作

晚泊依戍壘朝發傍山曲乘流擊桂楫沿洄盪寒綠近
巖蒼欲秋前峯淡如沐佳人餘好音遠道感躑躅嶺海
殊氣候欣慨換心目晴雲忽半陰高霞不相屬臨觴歎
寡歡解纜苦別促誰能永今朝遐心已空谷

愚樓獨坐

雨歇開耳目檐際喧鳴禽言登百尋閣送此千里心婆
娑池上樹叢桂多清陰芳華隨風發悠然披我襟白雲
近可攄斗酒時自斟且復歡此日何羨南山岑

懷舊

富貴當幾時誰能忘故鄉故鄉初策駕親交盈我堂婉
戀相契濶欸曲陳酒漿拳拳未能已送我發河梁日月
無輟軌兩見秋葉黃朝發城上樓獨立忽沾裳江漢多
風波孤生易感傷況憂佩萱草心結彌難忘

苦節篇荅友

涼風八九月吹我中庭樹當窗蕩子妻獨處歎遲暮姑
老壻不歸十載河陽戍累日斷晨炊蓄意欲誰訴人言
桃李顏毋為糟糠誤白石出清溪水流石不去妾命在
採桑遺金豈復顧貧賤無盛年朱顏已非故吞聲勿敢
言努力畏多露

官湖西二載矣感而有作

期月昔言可兩載驚逝波稍見喘者息未聞呻者歌竊

祿備藩籬敢言無斧柯十羊乃九牧牽束一何多蕪田
急芻餉禁旅頻經過涼風吹木葉颼颼隨江波中夜獨
轉側積痼成煩疴幸寬簡書責自顧將如何

青原五賢祠

王文成守仁以歐陽文莊德鄒文
莊守益羅文恭洪先聶貞襄豹配

姚江有遺澤螺水首漸被從者紛如雲青原成講肆遂
令空山阿絡繹勤車騎絃歌響林谷逢掖滿僧寺四君
尤挺出嗣音相鼓吹寂寥四十春講席蔓薜荔荒祠猶
巋然俎豆將委地山鳥懷好音林木自深蔚昔人未云

遠顧瞻橫涕泗百年一須臾峻阪策奔驥
裴裒岐路間
白日忽西墜如何丁我躬吾黨竟憔悴
題字破莓苔振
衣獨遐思

金牛泉

仙源出杳冥仙人去何所泠泠無冬春
潺潺自風雨白
雲生斷岸幽禽下修渚前山正寒翠木石坐堪數
悠然
濠濮間俯仰久延佇

懷舊篇寄嚴灝亭都諫

古人去我久同時良獨難相別復千里永夜長慨歎良
會憶國都羣彥皆齊歡嘽嘽眷明德灼灼同肺肝送我
涉濟水夜讌還辛酸君子厲苦節中道愁波瀾歲序忽
屢易雨雪淒且寒未敢言奮飛卑棲猶未安愁無澤蘭
贈中情何由殫

二

登我西北樓遙望東南岑重雲蕩回飈萬木為蕭森不
怨所思遠傷我千春心翩翩二三子零落踵相尋梁園

玉樹盡

譙明

東海洪濤深

荔裳

猶有絕塞客嚼雪成哀音

飛濤

舊有燕臺七子今張譙明即世宋荔裳遠繫丁飛濤謫閩外

平生膠與漆今作商與

參努力非少壯離憂孰能任思欲涉湖水朗詠遊長林
義車不我御歎息還沾襟

懷李暘若廉使

時自滇南報還粵東右司予在臨江晤言可待俄復見留滇中

國門置酒別送子之蠻方留滯滇黔間七載迅流光
章服豈不貴天末斷人腸駕言改東粵駢驂經豫章
具舟戒津吏遲君奉杯觴嘉會終難合佇立心徬徨
別時各

壯年倏忽鬢髯蒼孤居日已老九折路何長安得隨越
鳥從子以南翔

正月二日同家人飲梅花下

我來石龍城三閱桃符換今朝何太煥解裘尚沾汗蚊
蠅飛撲人百舌聲不斷盆梅纍纍開移來就几案叢花
破客顏高枝成近玩童稚共歡娛壺觴分爛漫故鄉有
骨肉草堂逼溪畔為園一畝餘小閣睨清漢怪石既礪
砢老梅逾傲岸花時定舉觴高明轉詞翰遊子苦索居

何年同飽看念此牽我腸歸心不可絆勝之以忘情爵
飲劇無算

雪中懷宋其武少參北征

攬衣登高樓飛霰灑几席木末鳴迅飈積素蔽廣陌飢
鵠無匹儔中林斂勁翮孤白不禦寒艱哉遠行客力疾
趨京圻修塗阻川澤候館多荒墟堅冰結衡軛知子念
王程努力事驅策無為傷旅懷領髮已垂白

花下獨酌

前年花蕊繁去年花蕊單去年花間葉今年花滿欄花
亦隔年盛人生詎不難一觴聊自勸酒少有餘歡詠言
非絲竹中懷從此殫柳下洵非拙三黜豈曠官何如耦
耕翁荷鋤常獨閑

鄧元昭同年自白下遺園蔬四甕

葦荷持作衣折蘭紉為珮慚非餐霞人吏隱滄洲內肉
食敢云鄙嘉蔬性所愛官齋數武地手種勤灌溉土膏
異所宜柔旨良不逮故人知我懷携餉千里外寒漿嚼

水晶翠甲浮瑤瑁，囑妻備旨蓄泥飲。佐高會，聞君復歸。
隱築室，依松檜，把酒忽三歎。田園久蕪穢，城頭黛色來。

碧嶂千尋在

閩阜山正對署齋

聊將故山心，耿耿遙相對。

得黃抑公粵西書，用猶疑照顏色為韻。

對酒不能歌，愁緒長悠悠。搔首西南望，念子行夷猶。相
思欲相期，道遠心然疑。炎鄉斷消息，含情當語誰。春雨
生，夜寒江猿相叫嘯。雙魚嶺外來，明月懷中照。既傷離，
濶苦兼訪山川妙。始知孤雲心，纏綿連海嶠。踟躕無可

言異域擁朱顏崇山多桂樹遊子難攀援憶君刺柳州
予客梧江側雲開山乍青瘴來雲改色羈棲十載餘奮
別無羽翼左遷亦何恨且得省鄉國年華各逝邁相勸
加餐食

珠泉

袁州

亭榭何淹暖倚檻臨潺湲穴魚遊暖日庭柯含碧烟微
響瀉哀玉清流膏渚田心懷濠上賞目謝區中緣昌黎
昔來牧游詠胡不傳

桑棗舖

路僻名偏好幽懷動行客
磽壤少桑林陰崖疊雲石
窈窕山雞啼淒迷礪草積
人家隔數峯何處詢陳蹟

軍家兒

袁州作

東家瓜蔓弱結子過牆去
牆傾瓜蔓斷瓜落不知處
誰謂軍家兒親愛無父母
但為軍戶難生小寄他乳
阿父既逋亡軍書攝補伍
不辭行荷戈差科猛如虎
官編作運船破產難措拄
袁州數百丁磨滅成黃土
縣吏覓根

株迫呼匿無所中夜促兒逃暗驅出門戶野火延枯桑
那得相憐取兒啼夜安歸失足沈寒溪朝為懷中兒夕
作溝中泥

出秀江驛之石嶺

炎暑遠行役修塗一何艱川巖苦詰曲徒侶相攀援種
芋開崇坂種苗荒平田人力何不齊農功安可諉顧聞
深樹林失木有窮猿哀鳴求其曹重雲蔽山原惻惻起
憂思長謠無與言

送莆田余全人

海隅有珍木翩翩雛鳳棲羽翼何皎潔文采紛陸離飛
來集庭樹四坐生光輝春華方馥郁奮翰疾如馳綢繆
慕高義慷慨心相知南樓置斗酒星漢何參差搖落感
秋節少壯真良時努力策騏驎掣電誰能追浮雲會當
合毋使中心違

避風馬當

衝飈捲白日天吳走江甸萬籟號朝昏驚沙淚如霰信

宿還逡巡鬢髮忽已變咫尺望中流孤嶼眇不見彭殤
且旦暮淹速何嗔羨驅策畏簡書歲月逝將宴扶搖誰
怒飛徒言笑斥鷃

銅井行

夜行過銅井燈明夜未永為聞車馬喧滅火不開門使
君且勿怒應差有官戶官戶差未歸室中存寡媳前日
騎使至昨日逃人住揮鞭索雞黍破釜出門去語罷淚
沾襦九疑生路衢使者出乘傳青錢無酒沽不見昔年

夜猶有女當壚

沙溝行

驛名

沙溝黃沙滿征客腸堪斷
雨頽驛館廢風急馬啼緩
哀此大河濱水陸稱通津
艤舫自北至曳舟千餘人
村落盡空巷田野餘荒榛
不怨飢與渴游子不得歇
日暮還驅車照此寒宵月

濟上紀事

五月雷未震四月霜仍飛
夏寒麥穗死冬旱麥苗稀
寒

暄天所令二氣何乖違
河流細如髮漕艘牽濁泥
水泉豈不濬民力良已疲
軍書急芻餉畝稅方繭絲
憂時使心惻躑躅臨路歧

孟廟

磊磊嶧山巔終古棲靈異
巖巖一人起方寸塞天地
獨立張孔顏諸儒息淫詖
棖棟洵煌煌宮牆接洙泗
靈旗儼翱翔古木聳寒翠
母氏斷機堂石像何惴惴
下拜復傍徨愴然墮我淚
灑掃何寂寥門廡少倫次
佇望念前

修遺軌毋中墜

行經兗州懷東魯諸生

平原何莽蕩
叢業見鳧嶧
大壑起寒烟
泗水已咫尺
有美彼諸生
聯翩聚講席
討論餘清燕
絃歌奏金石
寒暑甫三徂
詩書就奔迫
道旁少居人
所見無逢掖
良士匿幽棲
珠玉媚山澤
浮雲難久留
征馬無停策
徒餘懷舊情
皎月悵今夕

學餘堂詩集卷七